

# Lefebvre-enea



ARITZ GALARRAGA

**B**eldurra diot iritsiko den egunari. Ze, ekidinezina da, bada-  
kit, noizbait, berandu baino lehen, iritsiko dela etxeok  
sententzia hau paratuko didatena: “edo liburuak edo gu”.  
Munstroa hazi eta hazi ari baita azkenaldian, ezin eutsirik,  
zazpi bizitza balitu, balitu ez, banitu bezala –liburu guztiak ira-  
kurtzeko, alegia-. Txiki geratu zaigu bizitexea hainbesteren-  
tzat –ehunka gutxi batzuk izango gara-. Eta beldurra diot egun  
horri, “edo liburuak edo gu”, ataka horretan, zer aukeratu  
nukkeen garbi daukadalako.

Horregatik, tarteka begiratzen ditut salgai dauden etxebi-  
zitzen iragarkiak. Horregatik eta bizigarria delako oso. Nik,  
inolako ondasun materialik –eta bestelakorik ere– ez daukan  
honek, etxebizitza bat erosi nahiko luke bere liburu guztiak  
bertan sartzeko –eta horrela bere etxetik bota ez dezaten-.  
Etxebizitza bat soilik liburuak gordetzeko –eta gero noski,  
ihesaldiren bat probestuta, inoren interferentziarik gabe pa-  
txadaz irakurtzeko-. Ez da erronka erraza. Aurtengo udan,  
ordea, helburua lortzetik oso gertu egon naiz. Etxebizitza  
bat ikusi nuen salgai, prezio onean, aski handia biblioteca duin bat  
hartzeko. Nabarregosen zegoen gainera, etxetik gertu, bai-  
na era berean etxetik kanpo, hain zuzen Biarnon, hain zuzen  
Pierre Bourdieuren lurretan. Eta, pastizaren ginga, etxebizitza  
hori Henri Lefebvre-rena izan zen, XX. mendeko pentsalari han-  
dienetakoa izan zenarena. Problema bakarra: iragarkia ez zela  
berri-berria eta eraikina jada salduta zegoela. *Shit*.

Liburuentzako etxebizitza bat erosi artean, beraz, ados nago  
bizikidetzako plan bat behar dugula. Ni prest nago karga arintze-  
ko, baina behar dut etxean biblioteca bat. Zenbat liburukoa  
da, hartara, biblioteca baten neurri egokia? Montaignek zioen,  
noski, ze listoa tipoa, berea: mila ale ingurukoa. Momentuz  
alde batera utziko dugu gaztelu batean bizi zela. ●



## “EUSKO JAURLARITZAK BEGIAK ITXI DITZAGUN ESKATZEN DU”

### BIZITZAK ERDIGUNEAN KOORDINADORA FEMINISTA

Emakunde Lehendakartzaren ardura izatetik Berdintasun sailera igaro da Emakunde, Jaurlaritzaren agintaldi berrian. Bizitzak Erdigunean koordinadorearen esanetan, Emakunderi zentraltasuna kentzeak “bereizkeriaren kausetan eragiteko eta horiek eraldatzeko gaitasuna kentzen dio. Gobernuak herritarrak engainatu nahi ditu soinu oneko hitzak erabiliz (forma alde batera utzita edukia dela garrantzitsua...); hori komunikazio-estrategia hutsa da: benetako argudiorik gabeko irudikapen hutsa”.

2020/09/16

